

TITO WÛR Pawrô Jõ Kàhhôc

Ûhÿ, pê Pawrô pê Jeju jarkwa na memprar catêjê nõ, ne Tito mã hõ kàhhôc kujate. Na pê hõ kàhhôc ita japrỳ pê **Tito WÛr, Pawrô Jõ Kàhhôc** (Tito). Ne pê Tito ajco Pawrô kôt apu ipa. Jirô pê mã pê Pawrô Kēnpojrejõ pjê kam Jeju na mehkwỳ mehkri atajê to ihmipej catê na hãm. Ne pom cu me hõ kàhhôc cahyt ita kam, pê Pawrô Tito mã, jũ caxuwjũmjê te me cupê Jeju na mehkwỳ na cumã amji jarēn, ne ajteare mã cute amji kam me hapac xà ton atajê cawpa. Ne hanea ne cute cumã, cute me hũmreimpejti pê catyt kam atajê to, Jeju na mehkwỳ jamãr catê nõ xãm na hũjahkre. Mãrquê me cumã Jeju na mehkwỳ te ajpēn kam mehcarĩcti kam, amji to me ipijapar to hahkre na, cumã hũjahkre.

Pê Pawrô Tito mã amji jarē

Carati 2.1-3

¹⁻² Hàpà Tito, ipê Pawrô, ne ipêPahpãm mã ijapēn catê, ne hanea ne ipê JejuCrixto jarkwa na iprar catê, ne pa wa ha amã ihkàhhôc ita to. Pê Pahpãm icapi, ne mehkwỳ wÿr ikujate. Pom pê ramã mam amji mã mehkwỳ capi atajê, waite mehtehcajpar, mã cute me hũnãr to ihtyãj prãmte, pê me hÿrmã ikujate. Ne hanea ne cute Jeju to amji mã mehhimpej kam me to incrà tu to prãm to pê mehwÿr ikujate. Ne hanea ne caxwãm catia mã, catyt kam me

papaprãnte, me cumã Pahpãm te amji kam hapac xà tohahkre. He nee Pahpãm apu ihhêj nare, ne rÿ pêa mã, pê cormã pjê ton nare kam, me pamã cuteamji cahê na me pahto ipijapar rohnÿtti mã xà na amji to, cu pahtÿj me hikaj.

³ Pê rÿ pêa mã ramã me pamã amji to. Ne ramã cute me pamã amji ton xàakam hàhhuc, na ri ihtÿj ita caxuw apucahê na me pancjêj xà to me pamã hahkre. Ne pomcute me pamã ampo to hahkre xà ita pê imã cugõ, ne ite mehcunea mã to icahkũm xà na harkwa ta. Ne Pahpãm te me pahkên kêanre catihti ata pê me pahto hapôj ata jarkwa kôt, wa mehcunea mã harên xà impejti itajê jarên to ipa.

⁴ Ýhÿ Tito, itea wa amã ihkàhhôc ita ton. Ampo na? Cu ajwar Jeju to amji mã pahhimpej ita kam, wa itÿj ato amji kra. Ne Pahpãm pê me pajõ Inxũ Cati, ne ihcãmter Jeju Crixto te ri me pahkên kêanre pê me pahto hapôj, na wa ijõtpê me cumã acajrên to ipa, ne me cumã:

— Tito to impeaj ne, ne caprĩ, ne caxwãm pê me cumã me acarĩcti jõr to me apa — hane.

*Tito te mehkwy to mehhimpej catêjê pyxwÿr xà
1 Timot 3.1-13*

⁵ Cwÿrjapê pê wa cô jipôc ri, Kênpojrejõ pjê ata kam guwahi, ne amã ijarkwa hyr to:

— Tito, cormã nee jũm te krĩ cunea kôt Jeju na mehkwy mã me to ihhimpej catêjê pyxwÿr nare. Cwÿrjapê ca ha ahpÿanre na me akwÿ cunea mã, me toihhimpej catêjê ton partu — hajÿr.

⁶ Cwÿrjapê wa ha ato ihhimpej. Ca nee Jejuna mehkwy to ihhimpej catê na, atÿj jũm xãm nare.

Ne quêt cute me hajÿr catêjê nō, ca ha hām he. Quêha hūmre nō pê catyt kam ipa catê, quê nee jūm ihkôt harên nō to kên nare, ata pê quêha me to ihhimpej catê. Ne cumã hīxi pyxit peaj, neajpên na me ajkrut peaj. Quê ha mehkra xwÿjê pê catyt kam Jeju na mehkwy. Mār quê nee jūm, me hūpar nare, krã kêanre na, amehkra to ihcakôc nare.

⁷ Ne Jeju na mehkwy to mehhimpej catêjê pupun catêjê atajê, quê ha Pahpām jàpên xàa to me hàpên to me ipa. Cwÿrjapê quê ha mehkwy nō te, cute ampo to kên nō na harên na, quê ha nee cupê mehkwy to ihhimpej catê nare. Ne me cumã, cute amji kam me hapac xà imejti cajcucre to me amji jarêc jahkre pej. Ne haneane me cumã cute amji kam hapac xà pytīti to amji jarêc jahkre pej. Ne por quê ha me cupê mehkwy to ihhimpej catêjê atajê, quê ha nee amji toame cati prām nare, ne nee amencryc xi nare, ne nee côxÿhti to ame amji to ipipân to me ipa nare, ne nee ame hàprê nare, ne nee ihtÿj ahti na hàpên xàkêanre atajê to amji to me hakràj prām nare.

⁸ Ne quêt ihcunea na, me hūrkwā to me hàhcjārenti ne, ne me cumã ampo pej pit kīn. Ne caxwāmcatia mā amji to mehhimpej to mempej, ne ampo kên cunea tēte me amji jiprôn to me ipa. Ne mehcunea to me amji kam hapac to me ipipēnti to me ipa. Ne catyt kam me Pahpām jarkwa kôt ameipa. Hōhō, quê ha Jeju na mehkwy to mehhimpej catêjê pupun catêjê atajê cute amji kam me hapac xà to me hane.

⁹ Ne ihtÿj me caxwām pê amji mā me Jeju jarên pejti itajê to me ipijarō to imejti to me

ipa. Ampo na? Pom harën xà ita, nee mã ihhêj xi nare, ampeaj kam ri. Ne ihtÿj hũjarën xà ita to me cumã me hakryti to ihtÿj to ipa. Ne hanea ne hũjarën xà ita, cute cuna mã ame ampo to cupan catêjê mã harën to ipa.

Tito te Kēnpojre catêjê mãn xà

¹⁰ Ÿhÿ, Tito, ca ha maamji to guphê to apa, nãmri ampeaj kam cute me Mojxe xwÿjÿ kàhhôc to me cumã hahkre to mehkêanre to meipa catêjê jàhtô. Ne xwahna cumã me ateJuta catêjê kôt me Mojxe xwÿ jökàhhôc cunea kôt me amji ton na, me cumã me atoprãm. Na ri hõtpê me amã hũjarën to hane he:

— Gapacta ne Jeju to amji mã me ahimpej to me apa, ne hanea ne hĩkjê na, Mojxe te me hapackre xà cunea kôt me amji ton to me apa — hane. Ne amehhêj xia jarën to me ipa. Ne ame to ihhimpej catêjê pejti atajê cunea cuna mã, mehkên to pit mã ame amji kampa.

¹¹ Cwÿrjapê ri imã ate cute me hajÿrjê mãn na ato prãm. Na ca ha me cumãn prãm, ne me cumã garkwa to hane he:

— Me kêt! Ne aracri ame apa! Ca cama apu krĩ kam ikrejàhtôa kam mehkrĩ atajê cunea te me Pahpãm jarkwa pejti ata kôt me ipa xà kaj na mehcahpêrkàr to meapa. Ne ate ampo to me cumã hahkre xà kêanre itajê to, nee ate me cumã hahkre xà nare. Ne ate amji mã meh pore incwÿr prãmte, ca ame hajÿr to me apa. Xà nee ajte ita na me apahàm nare? — Hõ, ca ha me cumã hane.

¹² Ne Kēnpojre jō pjê ata kam mehkwyà nõ te Pahpãmjarkwa to ihcakôc catê ata te amji jarēn to:

— Me ipê Kēnpojre catêjê hōtpê me ihêjxia to me ihêj xi, ne ihêj rûm me ipêampo kên jàprêa to hàprê atajê, ne ampeaj kam ite me xuwaca, ne cama ampeaj kamme ijàpàn cati — hane.

¹³ Ne pom cute ampo na me amji jarēn xà ita, ampeaj kam ri. Cwýrjapê ca ha ma cute amji kam me hapac xà ita tète me cahpêrkarto ihtýaj to apa, quê catyt kam caxwãmcatia mã Jeju to amji mã mehhimpej to me ipa.

¹⁴ Nee ca ha hipêr mam Juta catêjê quêtjê jũjarēn xà to mehcakôc catêjê me, mehkraa kam, cute me caxuw amji mã mehcakôc xà to mehhimpej atajê to me amji japackre nare. Ampo na? Atajê te ri ramãPahpãm jarkwa pejti caca ne me hucu. Nãmri mehcakôc xà itajê nee Pahpãm pîn me caxuw me cumã hapôj nare. Ne por Juta catêjê te Jeju kôt me amjiton jicu atajê krã pîn ri me caxuw itajê japôj.

¹⁵ Ne Pahpãm te ri me pahcaxwãm pê ame pahcũmpej, mã me pampej. Cwýrjapê cu ampo pejti na pit mã me prãm. Ne por me Pahpãm par nare, neampeaj kam me caxwãm pê, mehtũmti atajê mã ri, ampokên itajê cunea na prãm. Neme cumã ampo pejti itajê ihkêanre, ne ampo kên ri me cumã impej.

¹⁶ Ne ihtýj Pahpãm kôt me ipa catêjê na me amji jarê. Mã nee me hàpên xà itajê Pahpãm kôt me ipa catêjê na me harēn nare. Ne me hũpar nare, mã ihtýj ame hàhcurê to ame ipa. Na ri nee ampo caxuw mempej nare.

2

Tito te catyt kam mehkwy to ihhimpej xà

1 Timot 1.6-14; 4.6-16

¹ Ne quêt ca nare, ca ha catyt kam ampeaj kam me cumã ate ampo to hahkre xà atajê to hahkre.

² Ne mehkà atajê mã gũjarên to hane he:

— Ame amji mã quêt nare, ne me amji mã ampejti ne. Ne catyt kam, caxwãm catia mã me apa. Ne ampo kên cunea tète me amji jiprôn to me apa. Ne Jejua to amji mã me ahimpej tyaj to me apa. Ne amji mã me akwý kinti to me apa. Ne me gũcanãar kam me apa — hane.

³ Ne hanea ne pyjê kà atajê mã gũjarên to hane he:

— Ca ha Jeju mã me amji gõ, ne catyt kam, ate amji kam me gapac xà impejti to amji mã me apijapar to me apa ata na. Ne nee mehkwy toame akwý mã ihkôt harên kên to me apa nare. Ne nee côxyhti to akôm to amji mãahimpej to me apa nare. Ne ampo pejti to, ca ha quêt me hahkre to me apa.

⁴ Mâr quê amji cuxà mehkwy cahãj tuwre atajê mã awjarê, quê ha cute catyt kam ame ipa na, quê ha ramã amji mã mempjê me, mehkra kîn to me hahkre.

⁵ Ne amji mã me ampejti ne, ne ampo kên cunea tète me amji jiprõ, ne catyt kam me ipa, ne nee apu mehkwy pêmempjê caxun to me ipa nare. Mârquê catyt kam me hũrkwa jàpên xà to amjimã me hàpên pejti to me ipa, ne ihtýj amji caxuw mempjê kam me hapac to me ipa. Ne me hàhcajrên jàhcaprĩhti ne. Quê ha cute amji to me hàpên tohajýr to me ipa na, quê ha nee jũm

Pahpãm te me pamã ita to hahkre xà ita cuna mã ihcakôc kên nare — hane. Hôhõ, ca ha pyjê kà mã ahimpej xà to hahkre to hane, mãr quê mentuw kwÿ mã to hahkre.

⁶ Ne mentuwjê to hanea ne me hapackre. Mãr quê caxwãm catia mã, catyt kam amji to mehhimpej, ne ampo kên cunea tête me amji jiprôn to me ipa.

⁷ Ne ate hajÿar, ca ha catyt kam apa ne ampo pejti ton to apa, mãr quê amji mã me apupun xà kôt, hanea ne catyt kam me ipa. Na ca ha me cumãampo to hahkre kam pra, ne acryac kam, catyt kamme cumã ampo to hahkre. Ne ampo pejti to hahkre to, ca hirãa pê me cumã amji pro rên to apa, ne nee ca ampo kên ton, ne amji cwÿrpê ahêj nare. Ne quêt caxwãm catia mã ampopejti to me cumã hahkre to apa.

⁸ Ne garkwa pej to pit mã me cumã acakôc to apa, mãr quê nee jũm apar caca, ne amã ahêj xi na hacjên nare. Ne imã ate amji kam gapac xà impejtiitajê na pit mã me ato prãm, mãr quê nee me pahcurê xwÿn nõ apu akôtharên to kên nare. Ne cama me pahkam ihpahàmti ne.

⁹ Ita caxuw ri imã ate cama me cumã hàpên tome ipa catêjê japackre to hajÿr na, imã ato prãm he:

— Amji caxuw me gõ pahhi kampa, ne catyt kam me cumã gápên pejti to me apa, mãr quê me gápên xà impejti atajê kôt, amji mã me akîn to impejti to me ipa. Quê me gápên xà na me arê, ca nee xuwca te me cumã ampojarên nare, ne aracri cute ampo na me arên atajê to me.

¹⁰ Ne nee ame gō pahhi pê me gâhkîj nare. Ne quêt ita to ca ha me he, catyt kam me apejti na me apa. Ne me amji jarkwa par pejti to me apa. Quêha mehcunea amji mã me Pahpãm te me pahkên kêanre ata pê me pahto hapôj ata cupa, ne hanea ne amji mã cute ampo to hahkre xà itajê cupa — hane. Hôhõ, caha cama me cumã hàpên catêjê japackre to hane.

*Pê Pahpãm me pamã amji to ajpê
Epet 2.8-10; 1 Texarôn 1.9-10*

¹¹ Pê Pahpãm me pahto impejti prãmte, me pamã cute amji kam hapac xà itajê na amji to ajpê, ne amji pro mē. Mâr quê mehcunea me hõmpu, ne mehahkre pej, nãmri cupêa ri me pahkên pê me pahto hapôj catê, ne ihtÿj cute amji kam hapac xà ita to me pahcunea kampa, pjê cunea kam.

¹² Ne ihtÿj pahte mam amji kam me pajapac xà kêanre atajê jicu to me pamã hahkre. Por pahte amji kam me pajapac xà te Pahpãm pê ampÿa mã me pahto ipa atajê mã he:

— Ca ha nee amji to acati prãm nare, ne nee ahti napyjê caxun nare, ne nee amji to gakraj cati prãm nare — hane. Mâr cu quêt ampo kên cunea tète me amji jiprôn to me papa. Ne catyt kam, caxwãm catia mã ame papa. Ne Pahpãm mã me amji jôr to me papa.

¹³ Ne quê ha amcro nō na, jũ caxuw, Jēju Crixto pê Pahpãm kra pê me Pahpãm catia ata, ihtÿj pjê ita wÿr amji jaxà, na cu ha pahtÿj hõ amcro kam me pajakryti ata na me hikaj. Quê ha mehcunea,

cute me pahkên kêanre pê me pahto hapôj na me hõmpu, ne me hahkre pej.

¹⁴ Nãmri taa mã pê me pahcunea kritxwỳ na amji to, ne me pahcunea jahpan xà na caprô jaxwỳ, ne ampo itajê cunea mã amji gõ, ne amji mã huwahiita to pê me pahcunea kên pê me pahto hapôj pa. Me pahte ampo pej to pit mã ame amji kam pajapac to me papa prãmte ri, cute me pamã amji kam hapac xà to ihtetetti. Ne me pahto amji kwỳa to prãmte, pê me pantête mepahkên itajê mã amji gõ.

¹⁵ Ỗhỹ, Tito, ca ha atỳj ampo itajê cunea to me cumã hahkre. Ne Pahpãm jarkwa kôt, ampo na mehpeacre atajê tehcajpa, ne hacpỹa mã me toihtỳj. Nãmri quê ha jũm ampo to kên na, ca ha kam atêm pyrentu, Pahpãm jarkwa kôt, ne intête ihcahpêta. Ne nee amji na jũm te, ate Pahpãm jarkwa kôt ampo to hahkre nare na, cute garên na hamãr nare.

3

Cu ha catyt kam me pajõ pahhi atajê kampa Roman 13.1-10; Epet 2.1-10; Tito 1.10-16

¹ Ỗhỹ Tito, ca ramã ate me pahkwỳ mã gũjarên xà itajê to gũjarên, ne hipêr to me hapackre, ne me cumã:

— Por me gõ pahhi atajê me, me ato ihhimpej catêjê atajê, ca ha amji caxuw me kampa, ne mehhimpej xà krac ri me apa. Quê ampo pejti ton na me amã awjahkre, ca ha me gũjarêan kam, hãn ne me ampo to.

² Ne atỳj jũmjê kôt ame harẽn kên to me apa nare, ne nee ame gaprê nare, ne cama me amjito impejti ne. Ne amji mã me aprĩa kam, me gâhcaprĩakam me cumã acakôc to me apa, ne amji to me akryjreprãm to me apa, ne nee me hirôa pê amji to me acati prãm to me apa nare — hane.

³ Pê mam me papê Jeju na mehkwỹ itajê me, me papê amji jahkre kêatre, na pê cu nee ajco me pajũpar nare, ne me pajõ pry kajna ajco ame papa. Ne me pahcurê xwýn caca xà kôt pit mã ame papa, ne ihkôat amji to me pahhimpejto me papa. Ne ampo kên kĩn itajê mã pit mã meamji jõr to me papa, por me pamã ihkĩntiatajê mã. Ne pahtỳj ajco ame ajpẽn curê to me papa, ne ajpẽn jũ na ame amji to prãm to ame papa. Ne ampo itajê ton to pit mã, ajco me amji pyrãc to ame papa. Pê ajco mehkwỹ, ahna ame pahkam incryc, pê cu hanea neamji jahpan xà na ajco kam ame pancryc.

⁴ Pê Pahpãm amji mã me pahkĩnti ita na me pamã amji to ajpẽ he. Na pê amji mã me pahto impejti prãmte, me pahkên kêanre pê me pahto hapôj.

⁵ Ne me pahkên pê me pahto hapôj partu. Xà pê cu ajkĩ me ampo pejti to na mã, pê ihkôt me pahto hane? Hãpà! He pê cumã me pahcaprĩ, na pê me pahto hane. Ne Pahpãm Cãrõ Pejti kôt me pahcaxwãm pê, mepahtetetti ita pê ihhêj rũm curmã ame pahpýpým, ne cormã pahte amji kam me pajapac xà na amencwýr.

⁶ Pahpãm jãhcajrẽan to hàhcajrẽn, na pê me pamã Jeju Crixto te me pahkên pê me pahto

hapôj xà caxuw ihkujate. Pê me pahtyc xà jahpan xà na ty, ne me Pahpãm wÿr me pamã pry jahkjê, pêcormã Pahpãm me pamã Carô Pejti gô.

⁷ Cwÿrjapê cu Pahpãm kam mare mã, cuna mã, catyt kam ame papa ita na, ne ahnaa jũ caxuw cahê napahte amji to me papijapar rohnÿtti mã xà ata mã ame acjêj.

⁸ Ne ijÿjarên xà itajê ri quêt ampeaj kam. Tito, pom ite amã ampo to hahkre itajêa to, ca ha ate ampeaj kam me cumã hahkre na, imã ato prãm. Ne cute me apar atajê, quê ha me taa ahpÿanre na me amji jarên to:

— Wa Jeju to amji mã ihmpej to ipa, mã Pahpãm te icaprĩ, ne ito kênre nare, ne imã Carô Pejti jôr, cwÿrjapê wa ha cumã amji gô, ne cumãijâpên pejti to catia to ipa — hane. Cu ha mepahte me ita to hajÿr na, quê ha ahname pahcunea mã ihkênre nare.

Pê Pawrô Tito mã amji krac ri mehcakôc kên catêjê cawpa

⁹ Ne pom cute me hajÿr xà atajê pê, ca ha ampÿa mã me apa he. Cute amji krac ri ihcaprÿ na amehcakôc catêjê kêanre atajê me, mam menquêtjê japrÿ to pit mã cute ame hahkre prãm catêjê me, cute Juta catêjêincaca xà cwÿrjapê tee ame ipijapu prãm catêjê atajê pê, ca ha ampÿa mã apu apa. Ampo na? He ampoitajê kôt hamreare.

¹⁰ Ne por cute me ato ipicokjêr prãm to ipa atajê, ca ha me hapackre. Quê ha me hÿpar nare, ne hipêr me ato ipicokjêr prãm, ca ha me

hapackre to ajkrut. Quê ha hũpar nare, ne cute to încrê xà ita kam, caha me cumã hikra, ne nee hipêr me to amji japackre nare.

¹¹ Ne por cute me ita ton catêjê, ca ha ramã mehõmpu, ne me hahkre pej, ramã me caxwãm pê amehkêanrena, na quê ha ihtÿj ame amji kên mã me amjirê.

Pê Pawrô Tito mã amji jarê

¹² Ne wa ite Metohjêxà jõ krĩ kam amji to pahhãjê kujahêc na amji kam ijapac. Na wa ha ma me awÿrArtima me, Tiquicô pijakrut itajê nõ kujate. Quê ha curi me awÿr cato, ne me amã ijarê, ca ha jũ na me amji to, ne ma Metohjêxà jõ krĩ wÿratêm pyrentu. Ne curia cu ha ajpên cajpa.

¹³ Me pahkwÿ nõ Xena pê Roman catêjê caca xà to cute me amji pyrãc xà ata jahkre pejcatê ata, me Apôr, quê ha amũ me anaa me tẽ. Atajê ca ha mehtêm xà ata na mehtehcajpa, mãr quê nee me cupê ampo hamre nare.

¹⁴ Ne imã me pahkwÿ te ampo pejti ton to me amji pyrãc na imã me ato prãm. Ne cute ame ampo na prãm to me ipa atajê na mehtehcajpa. Hõhõ, ca ha me ate amji kam me gapac xà ita ton na, quê ha nee me apê cute me amjikam hapac xà kôt hamreare atajê nare.

¹⁵ Ne pom icahê na mehcunea meipa itajê te me amã amji jarên kujahêc, neme pahkjêjê pê Jeju na mehkwy mã me ikĩnti atajê na ite me to amji japackre na me cumã ijarê. Nãmri Pahpãm te me ato impejti na imã me ato prãm.

PAHPÃM JARKWA CUPAHTI JÕ KÀHHÔC
Canela: PAHPÃM JARKWA CUPAHTI JÕ KÀHHÔC
(Portions)

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 1 Oct 2024 from source files
dated 29 Jan 2022

09d4e460-c38b-52b7-81c1-8300bfeb466a